

Հաստատապէս մահ. ոչ մի կողմից փրկութեան յոյս չկայ, եւ ահա այդ սարսափելի յուսահատութեան մէջ հայրը թողեց, լքաւ իր զաւակը, տղամարդը իր կնոջը, մայրը իր աղջիկը, եղբայրը իր քրոջը. հարուստ, աղքատ, շինական, աղնուական, աշխարհական, հոգեւորական աղիողորմ կականով թափուեցին գետի մէջ. գութը, ողորմութիւնը անհետացաւ. ամէն մարդ աշխատում էր իր կեանքը փրկել. շուտով սրբնթաց եւ յորձանուտ գետի երեսը լցուեց գիականների, անմեղ զոհերի մարմիններով. ով լողալ գիտէր, մի կերպ ազատուում էր, ով չգիտէր, յատակն էր իջնում. օրհասական կռուից պաշարուելով, լուղորդները խափանում էին միմեանց փրկութիւնը. տղայք, աղջկունք, հիւանդներ ջրի երեսն իբրեւ խուլ լցուել էին, իբրեւ մրջին քշուում էին. յղի կանայք ծանրութիւնից, ստնտեայ մայրերը մանուկներով ծանրաբեռնուած, ընկղմում էին եւ անհետանում. միմեանց օտքերից բռնուելով, ջրի խորքն էին սուղւում. ջուրը քշում տանում էր իբրեւ փայտի տաշեղ: Մնացեալները կամ լողանալով փրկւում էին եւ հասնում էին եզրը, կամ բռնելով նաւակների ծայրերից, ձիերի եւ գրաստների պոչից, մի կերպով դուրս էին գալիս: Շփոթութիւնը գնալով սաստկանում էր. Պարսիկների բարբարոսութիւնը իր վերջին ծայրին հասաւ. նրանք ողորմելի Հայերին սկսեցին տանջել եւ ստացուածքը ձեռքներից խլել: Խղճալիների կոծն ու աղաղակը, օգնութեան ձայնը թնդացնում էր սարերն ու ձորերը, բայց ո՞վ էր լսում, ո՞վ էր գթում: Ով բախտաւոր էր, մի ձի կամ մի գրաստ ունէր, կարողանում էր մի կերպ փրկուիլ, բայց հազիւ հասնում էր միւս եզրը սրտատրոփ, այնտեղ նոր փորձանք, նոր բարոյական տանջանք եւ մահ սպասում էր. այնտեղ կամ Պարսիկն էր սպանում, իրան կինը եւ գոյքը յափշտակելու համար, կամ իր ընտանեկան գեղեցիկ աղջիկներին